



Minggu, 07 Mei 2022

Ogen: Joel 2:3-11



Tuhan Erlenggur



Lenggur e me sora si megang i awang awang si megati jadi nandangi udan wari. Sora e rehna erkiteken tabraken angin si meter seh terbegi ku kuta-kuta. Sora e tempa nuruh gelah nusur udan. Lenggur e labo kepe terjeng fenomena alam, banci kepe nuriken sada perbahanen si mbelin. Temanta bas renungen enda, 'Tuhan erlenggur' nuriken sada perbahanen Tuhan, si mbelin, e me merentahkan tentaraNa, serdaduNa guna ngikutken perintahNa. Perbahanen Tuhan e pagi jadi tupung wari Tuhan reh me. Wari Tuhan si imaksud i bas kitab Joel e e me tupung kerehen Tuhan ngukum bangsaNa i bas kelapatuhenna ngukitken kata Tuhan e. Ilawanna dingen itundalkenna Tuhan e.

Tanda-tanda kerehen wari Tuhan e enggo tangkas e me: reh labang desken api mangani sinuan-sinuan, seh dungna taneh e bali ras gurun pasir. Tempas labang e bali ras kuda, perkiamna bali ras kuda perang. Lompat-lompat i datas deleng deleng gereta perang erderak sorana desken dukut kerah i pan api. Erbaris ia desken tantara si enterem si ersikap lawes erperang.

Labang e simbol tantara kalak Babil si reh nerang bangsa Israel, tantara si mbisa si ersikap lako erperang. Tantara e ngeradasken taneh Israel, ras bangsana iangkut ku Babel. Sebagin tetap tading i Jerusalem tapi kerina i teruh kekuasanna. Ise pe la ngasup mpengadi kai siibahanna. I pusat kota nari seh ku uruk-uruk kuta idemi tantara Babel e. Adi mentas kancang ia kerina kalak nggirgir. Doni enda mundu-undu, langit nggirgir tupung ia erdalan. Matawari ras bulan jadi gelap, janah bintang-bintang pe lanai ersinalsal.

Tentara Babil e jadi alat Tuhan ngukum bangsa Israel e. Tupung Tuhan erlenggur, iperentahkenna tantara Babil e lako ngkernepenken Israel, kerina kernep la lit si tersisa. Amin tantara Babil labo ietehna kai sura-sura Tuhan, tapi arah gegeh Tuhan ia banci jadi alat guna nehken sura-suraNa. Adi Tuhan enggo merawa I se banci mpengadisa? Labo ise pe ngasup nalukensa. Tuhan e jine pagi ngadi merawa, e maka ituduhkanNa ka lias ateNa.